

## Ombi la Ustahimilivu la Unyenyekevu

Eliya alikuwa mwanadamu mwenye tabia moja na sisi, akaomba kwa bidii mvua isinyeshe, na mvua haikunyesha juu ya nchi muda wa miaka mitatu na miezi sita. Akaomba tena, mbingu zikatoa mvua, nayo nchi ikazaa matunda yake—**Yakobo 5:17, 18.**

Masomo muhimu yanawasilishwa kwetu katika uzoefu wa Eliya. Alipokuwa juu ya Mlima Karmeli aliomba ombi kwa ajili ya mvua, imani yake ilijaribiwa, bali alivumilia katika kufanya haja yake kujulikana kwa Mungu.

Mtumishi aliangalia wakati Eliya alipokuwa anaomba. Mara sita alirudi kutoka kuangalia akisema, hakuna kitu, hakuna wingu, wala ishara ya mvua. Lakini nabii hakukata tamaa katika kuvunjwa moyo. Aliendelea kupitia maisha yake upya ili kuona pale aliposhindwa kumtukuza Mungu.... Kadiri alivyouchunguza moyo wake, alionekana kupungua na kupungua zaidi, haswa katika kujikadiria kwake mwenyewe na mbele ya Mungu. Alijiona kutokufaa kitu na kwamba Mungu alikuwa kila kitu kwake; na alipofikia kiwango cha kujikana nafsi, alipokuwa kuwa amemng'ang'ania Mwokozi kuwa nguvu zake na haki yake pekee, jibu lilikuja. Mtumishi alitokea na kusema, "Tazama, wingu linatoka katika bahari, nalo ni dogo kama mkono wa mtu." 1 Wafalme 18:44.

Tunaye Mungu ambaye sikio Lake halijafungwa kwa maombi yetu; na ikiwa tunadhihirisha neno Lake, ataipatia imani yetu heshima. Anatutaka kuyafunganisha mapenzi yetu na mapenzi Yake na kisha itakuwa salama kwake kutubariki; kwa maana hatutaitukuza nafsi anapotupatia mbaraka, bali tutarudisha utukufu wote kwa Mungu. Mara nyingi Mungu hajibu maombi yetu papo hapo tunapomwomba; kwa kuwa kama angefanya hivi, tungeweza kuchukulia kuwa sawa tu kwamba tuna haki ya kupewa baraka zote na fadhila anazotupatia. Badala ya kuipeleleza mioyo yetu ili kuona kama kuna uovu wo wote tulioupendelea, dhambi tuliyoitenda, tungekuwa hatujali na kushindwa kutambua utegemezi wetu juu Yake....

Eliya alijinyenyekeza mpaka alipokuwa katika hali ambayo hangeweza kujitwalia utukufu. Hii ndiyo hali ambayo kwayo Bwana anasikia maombi, kwa maana tutampatia Yeye sifa.... Ni Mungu pekee astahiliye kutukuzwa.